

Pabia ke primatas i ka bom limária pa tenedu na casa?

Na grupu dé primatas i sta kilas ki cunsido pa nome di dari, santchus (suma santhu di tarrafe, santchu mona, santchu bermedju e con) i també concanhe. É Primatas i limiarias selvagem, ki ka bom bu tene na casa. É grupu di limiarias ora ki bu tenelis na casa u pudi ta odjal suma un bom kusa, contra na bardadi é limiarias esta na garandi cansera, é ta lestu ku stressa fora di sé kau normal de vivi. Conforme é na cria pa tchiga sé idade adultu é ta munda sé comportamentu, é ta kiri bim sedu más independenti i é ta kaba pa bim adota sé forma brutu di comporta suma ki kê tene na matu. Sé dunus ta cansa tchiu pa controlalis. Alguns dunus ta bim kaba pa dicide matalis pa livra di ki cansera extremu.

Essi i alguns razons ke ta mostra kuma i ka bom tene é tipu di limiarias na kasa:


É pudi murdiu. É tene garandi capacidade pa fidi ku força. É pudi fidiu, fidi bu fidjus, bu família ou bu amigus. Conforme é na cria é na má na garandi, i també má na tene força. Nim ki santchus ma pikininus pudi molostrau riçu. Murdidura dé limiarias pudi sedu garandi i grave suma ki ku pudi odja na foto.



Santchus, cons, daris ku cocanhe tene despesa garandi. Fora si balur di compra, é limiarias ta cumé kusas ki pudi sedu caru i també cansadu odja pa compra. Si é ka sedu alimentadu ku si cumidas é pudi bim duenci pa falta di nutrientis ké dipindi del. Buska um veterinariu pa pudi cura sé doenças i cansadu i caru. Randja um kau na bu kasa pa pudi tenelis ku segurança e ka fácil i també i pudi bim sedu caru pabia cada dia é na garandissi. Tchiu espécis i nativus di zonas tropicais, logu i precisse tan pa garanti ora ke lebadu pa lundju di sé terá pa é ka bim passa friu, kila tan pudi tissi manga di despesa pa mantilis diritu.

Lembra kuma primatas pudi vivi tchiu tempu. Santchus mona, santchus di tarrafe, santchus bermedju, cons i daris pudi vivi ma di 20 anu na cativeru. Daris pudi tchiga vivi té 40 a 60 anu. Si dunu pudi tem di cuida del té dispus di kaba cria sé mininus k na bim kaba desinteressa pa brinca ku é limarias.

Manga di quintis ka ta suporta tcheru dé limarias. Nim ki bu pul fralda, i na tiral pabia é ka suma bebe di pekaduris, é má forti na usa sé mons. Logu é pudi xixi ku pupu na tudu kau ké misti. I tem ki especis k ta marka sé território ku sé pupu i ku sé xixi, kila pudi mancha bu mobílias, tchon di bu kau i fedintiu kasa. Cons ta ferga sé xixi tudu ku sé pupu na sé mons i dispus é ta bim toka i fedinti tudu kê ki bu tene na bu kasa, suma carrete, cortina, lençol, roupa.



Primatas pudi facilmente panha memu tipu di doença di pekaduris, suma gripe i utrus doença ma grave suma tuberculose. Abo ku bu família i amigus bó pudi bim panha doenças ki tipiku dé limarias i ki difícil diagnostika ou trata. Dunus dé limarias pudi duenci riçu.

Primatas i limarias selvagem. Nin ki criadu ku pekaduris sé manera ka na munda.

Conforme é na cria, é na garandi i pa instintu é na bim misti torna más independenti i na bim insisti faci kê kê misti. É ka sedu suma limarias domesticu ki ta rispita sé dunus, ou mininus. Primatas ke ta tenedu na kasa pudi torna intuleranti ku utrus pekaduris ou limarias ke ta vivi na mesmu kasa. É pudi bim maltartalis.

Primatas i limarias ku ta sedu muito curioso. É pudi molostra sé kabeça ou pekaduris ke ta vivi kél. É pudi provoca forti danus na kasa, pabia é pudi por exemplu sindi fugon, dana tudu ké ki panha ku sé dintis ou mons. É pudi darma produtos quimicus ke perigoso na kasa ou kumé kusas ke pudi duencilis.



Suma nó mininus é limarias ki muito djiru. É precisa de bata sedu estimuladu mental ku socialmente tudu hora. Si dunu tem di ba ta dal tchiu atençon és gora pudi sedu muito cansado té na puntu di esgotal.

Primatas ta fica turmentadu psicologicamente ora ke lundju di sé mamês. Sim contactu ku sé kumpanherus é ta bim desenvolvi comportamentos ke ka normal. É ta kumeça faci danu na sé curpu (é pudi por exemplo rinca sé kabelu). É tipu de comportamentu i muito preocupante pa é limaria ou pa si dunu.

Tenê bom sintidu i ka sufficienti. U pudi na bu sintidu dicidi kuma u na trata bu limaria ku tudo cuidadu pa mostral kuma bu gosta del suma alguin di bu família. Ma kê ke na bardadi é limaria misti i vivi ku sé família dissel, na matu.

Si bu dissidi vivi ku é tipu di limarias bu sta na assumi um compromisso ke na bim dura manga di tempu pabia é limaria na bim dipindi di bó te na fim di si longu vida. Maiores di quintis ka tene mau sintidu ora ké decidi busca é limarias pa tenelis na kasa. Ma dispus é ta bim nota kuma tarbadju kê tem ke dedikalis i más ki ké pensa ba, más ki kê pudi suporta. É ta bim cansa, pirdi pacença ou mesmu é ta bim torna mau ku sé limarias. É pudi tam bim torna frustradu ora kê nota kuma é ka na pudi sedu ki alguim diritu ké misti ba sedu pa sé limaria.

Primatas na kativeru é tene kuidadu profissional i intensivo na instalaçons especializadu. Jardin zoológico creditadu ku centru di aculhimentu profissional esta totalmente equipadu. Lá bu tene especialista ke treinadu pa lida kê limarias pa djudalis na kê ke é precisa. Maioria dé instalaçons esta muito cheiu ou saturadu ku limarias ke largadu la pa si dunus. Si bu bim misti larga bu limaria lembra kuma i cansadu odja bom kau especiazadu nundé k bu pudi dixale.

Abó bu ka esta na apoia conservaçon nim bu ka esta na djuda um limaria ora ki bu na kumpral pa tenel na kasa. Limaria ku na kumpra possivelmente i furtadu na matu. Significa kuma si mamé matadu. Também i possível di kuma utrus di sé família matadu também pa ki bebe pudi furtadu. Nin ki limaria ku kumpra i padido na kativeru, sibi kuma tudu manera i tomado di si mamê. Tudu primata tene necessidade di permaci ku sê mamê i ku si grupu di parentis nundé ké sai nel.

Tudu é limarias nin kê padido na kativeru é tené sé família i ka anós ki sé familia.

Essi i un contribuiçon di especialistas na estudo di primatas ki ka pekaduris, ke ta tarbadja pa Union Internacional pa Conservaçon di Natureza. É informaçon i preparadu pa Waters, Felicity Oram, Denise Spaan, Brooke Aldrich e Andrea Dempsey. Traduçon pa Portuguís e di Maria Joana Ferreira da Silva. Traduçon pa Criol e di Cristina Silva. Fotos I di Aranza María Hernández Gómez. Cartaz i fulhetu na criol e fassidu pa Ivo Colmonero–Costeira.

Gardicimentu

Nó misti gardeci Ekwoke Abwe, Andie Ang, Susan M. Cheyne, Kerry Dore, Malene Friis Hansen, Karthi Martelli, Carlos R. Ruiz Miranda, Russ Mittermeier, Anthony Rylands and Joanna M. Setchell pá sé cumentáriu ke djudanu mindjora primerus version dé folhetu. Foto i di @Hannah Duprey. É folhetu d’informaçon i foi produzidu ku apoio di Ouwehand Zoo Foundation i GaiaZOO Nature Fund, Netherlands. Folhetu na criol e tene apoio di CIBIO i TROPiBIO, Portugal ku apoio di União Europeia (NORTE2020/ERDF).

Afiliaçon di autures

Siân Waters – Barbary Macaque Awareness & Conservation, Marrocos

Felicity Oram – Orang JUGA – People working together to co-exist with wildlife

Denise Spaan – Instituto de Neuroetologia, Universidad Veracruzana, Xalapa &

ConMonoMaya A.C., Chemax, México Brooke Aldrich – Neotropical Primate Conservation / Asia for Animals Coalition

Andrea Dempsey – West African Primate Conservation Action, Ghana

Traduzido de inglês para português por Maria Joana Ferreira da Silva. Adaptação por Ivo Colmonero–Costeira

Maria Joana Ferreira da Silva – CIBIO–InBIO, Portugal & Cardiff University, UK

Ivo Colmonero–Costeira – Cardiff University, UK & CIBIO–InBIO, Portugal

